

四庫全書

集部

欽定四庫全書

鐵菴集卷五

宋 方大琮 撰

奏申

辭免御筆除右正言申省狀

自天疏寵無地措躬竊以更化三年病源故在進言一路遺脉僅存必相續之有人庶足憑以立國慨念盛世若時先臣歐陽修謂不繫職司劉安世謂不比閑慢矧

當陽微陰長之會內阻外訐之秋全賴繁官共扶急證
如某者生於僻壤少也末科多歷歲年率皆田廬之日
三趨選調不及權勢之門屬親覽於萬幾裨濫陪於百
執勾書列寺再轉為丞濡墨秘丘復叨佐郡兩暮且半
一善未聞顧何取於師言乃誤蒙於宸選其要在格君
心而學力不足其次在過官邪而風采不揚退惟何人
敢任斯責欲望公朝敷奏成命亟回別選鴻儒益重新
除之筆姑令馬走少安舊著之班

辭免御筆除起居舍人申省狀

聞命自天措躬無地竊以進言丹匭執簡赤墀皆右省
之通班出中宸之妙選敢期愚戇疊冒恩榮伏念某素
乏脩能自安平進兩書月紙曾無補於涓塵益近天光
重有慚於記注盍控循牆之避預深維谷之懷欲望朝
廷特賜敷奏急回成命庶無鵲翼之羞別揀碩儒以重
螭頭之選

辭免兼國史院編修官實錄院檢討官申省狀

仰觀國典最重史筵編摩者髦士是宜討論者大儒之事昔之世掌今以人兼既森森著鴻碩之羣豈瑣瑣欠馬走之一伏念某自慙獨學殊乏三長曾窺石室之書藏遽引蓬萊之舟去何裨騎省仍立螭階記言動於一時未之能信垂典章於萬世何所取材況嘗自請於祀釐豈宜久叨於執簡欲望朝省特賜敷陳亟收回誤墨之頒庶不為汗青之玷

辭免寶章閣直學士仍任申省狀

不允
附

渙汗載頒震驚失措伏念某早辭朝列濫玷藩方粗有
小心任嶺海拊循之責幸無大過皆天地容蓋之恩昨
者進松下之階留梅邊之戍曾勞力勞心之莫報而濡
首濡尾之足憂方溫理祈閒之詞廼已蒙增秩之賞深
惟直學士之兼職允謂榮名未聞郡太守之五年尚仍
仍舊貫於寵臣之數非不厚而任臣之意非不專其如
材技殫窮筋骸衰病不亟求於寢免恐自速於顛隤伏
望俯察危衷趣收前詔許畀二毛之餘景獲遂歸休別

求一面之長才早為鎮撫

辭免差知隆興府奏狀

不允
詔附

寵命渙頒危衷震惕伏念臣逖違宸陞冒領遐藩德意
布宣敢謂去天之萬里土風習熟不知入廣之五年極
臣力之所為荷聖心之見照求去甚堅而任甚篤受恩
愈厚而報愈艱今者山海息驚擾之虞田里慶豐登之
樂上或可以逭朝廷之譴下稍可以謝嶺嶠之民及是
時而退歸則末路之榮耀何圖詔綍復改州麾惟南昌

之故區乃江西之勝處曩以待蕃宣之任今亦為名望
之除自審衰殘難勝委寄伏望趣收前命更畀叢祠俾
返山林息餘生而歸老雖居畎畝無一息之忘君

勅

省所奏辭免依舊寶章閣直學士差知隆

興府填見闕恩命事具悉朕以卿宅牧海南五載淹
久颶風炎瘴迫隔中州乃能不彼夷其民布宣中和
藹有善最眷念忠藎不忘於心豈不欲亟下召環引
以自近洪都選候久刊印姑輟仁賢往為撫綏雖蕃

宣之任隨宜更革而地望隆重則今猶昔也人才難
得而骨鯁敢言足以尊本朝折姦萌者為尤難顧瞻
在廷重我感慨扶獎愛護朕志有在卿亦諒之否乎
亟宜就鎮慰彼氓黎半夜席前茲固有待所辭宜不
允故茲詔示想宜知悉冬寒卿比平安好遣書指不
多及

鐵菴集卷五

欽定四庫全書

鐵菴集卷六

宋 方大琮 撰

外制

吏部侍郎兼中書舍人兼權直學士院許應龍
兼侍讀

昔我孝祖日御經帷嘗講畢賜茶命講官稍前曰朕無
大過豈無小失況朕未能無過乎具官某種學有本秉

心有常不激不阿夙夜禁密繇講而讀匪曰序陞乾淳五十卷之書蓋將闕抽而鑰啟焉卿其以孝祖之風烈望朕朕亦以克家等之規益望卿交修胥敕無忝先朝非徒曰能讀也期爾有猷置朕無過可

左司諫曹幽兼侍講

國朝諸臣稱言官者必曰顯講官必曰頤朕謂顯氣和豈不宜講官頤氣直豈不宜言責其不得兼者可恨也爾東嘉宿學內直外和每覽奏篇謂宜茲選端平初嘗

以語之大臣矣亦閱三載廼遂於懷昔賢之不得兼者
悉以命汝夫魯經二臣所最究心者也益懋所學朝夕
誨台以成二臣之志以紬繹信諫之義蓋朕之信卿久
矣可

馬良母王氏江元秉母徐氏呂燾母厲氏並封
孺人

勅具官某母某氏王制五年柴祀問百年者就見之朕
三載一禋大賚四海爾子名在仕籍思華其親雖年未

滿百猶畀以初封眎昔人尊禮高年之意不既優乎尚服新命益綏壽祺可

淮西總管陳希差充蒙古國通好使特授武畧

大夫

勅具官某國家於蒙古非讐敵比也疆吏不戒以至疲吾邊毗通好之使頻歲屢遣竟未得要領以歸爾以小行人銜命再往其為朕諭以重惜民命兼愛南北之意進爾二秩以榮其行苟能成約則豐官醲賞不汝靳也

敬哉毋忽可

南劍州判官新辟差知贛州安遠縣鄭循降儒

林郎

勅具官某熙寧距今百七十年一時奉新書者貴顯何
限今其澤之存者誰與監門俠不受安石改官之餌流
離終其身中興初旌遺直官其後一澤如綫蓋累傳而
至爾循之身亦可以觀天理矣可以自愛重矣延平佐
幕弗克靖共營辟徑行漕臣劾上薄錫一秩朕不容私

循其省哉母忝爾祖可

鐵菴集卷六

欽定四庫全書

鐵菴集卷七

宋 方大琮 撰

表

謝秘撰福建運判到任表

四年去國徒抱畝忠一節起家就將漕指靡覺周原之
遠具宣漢詔之溫竊以瓘出諫墀責監楊帑綱奪柱史
黜掌沙征蓋好訐者罪當誅妄言者法無赦若夫改遷

已寵汰出仍輕曾流落之未幾又光華之狎至視往昔
僥踰之太甚信我朝忠厚之相承臣某中謝伏念臣起
自單寒素稱拙訥逢時清之更悲偕髦士以彈冠先後
無容分踵常途之役推遷偶及驟叨繁地之除非不願
於得君亦深期於寤主方思陳善之謂敬敢曰言人之
所難不自意全喘息以俟常立上側恩遇更親以見有
聖人之容本無罪言者之意讒夫規進飛語橫興巧援
前代之深文欲中微臣以奇禍僅延孱弱盡出生成拜

散吏於鏡湖時時仰祝紮幽人於槃澗念念不忘敢謂
陸沉終蒙簡在寵以木天之論撰畀之粉部之將輸若
蔡襄仕慶厯之時以氣節選至林枿在淳熙之世有廉
介聲皆出臣鄉見稱記壁沉事力已大殊於曩日而技
能又莫並於前修控免弗俞感恩至泣茲蓋恭遇皇帝
陛下思治如渴聽言若流兢兢世道之安危了了人才
之邪正察臣雖嬰龍領亦安有於他腸念臣久侍螭頭
非不識其何狀責其驅馳之來效贖其狂瞽之往愆臣

敢不肅戰吏饗講求俗蠹正身率下少新一道之精神
悉意寬民庸護七閩之氣脉

漕使謝到任表

支壘承流茂聞善狀計軫乏使就拜除書不煩跋履之
勞如被光華之選具宣隆旨深激丹襟中謝臣譟焉書
生惜於世故起家射策甫歷泮芹徒步登朝寢躋卿棘
慙無補報自跪撫摩所領雙符表視當塗為徧既逾兩
載臣與斯民甚安將去如初曰節與愛才僅堪於小試

夢不到於陞遷維江以西繇延至廣聯絡十有一郡舳
艫百餘萬艘糴穀湟中克佐馬牛之運埋輪道上欲空
豺虎之羣退惟何人當此隆委伏遇皇帝陛下屬精庶
政申飭羣工知臣綴班於庭備體九重之仁儉謂臣叨
試此土熟諳一道之戚休付以將輸責其課効臣敢不
究心飛輓悉意咨諏稽財貨之源流務公取予察官吏
之能否冀盡澄清

賀皇帝表

立皇子祈國公

統紹鴻圖有永在躬之慮慮深燕翼迄成立子之謀典
禮舉行人祇胥慶中賀伏以繼承有國所重明斷惟聖
乃能稽嘉祐之舊章暨紹興之近轍選賢而長既愛且
親播告四方翕然度越前代遠甚恭惟皇帝陛下儉慈
守位剛健體天克勤於邦謹一祖六宗之託啓祐厥後
邁三代千歲之安蔽自宸衷誕登哲嗣丕建齋壇之節
聿新公袞之華喜溢宮庭休綿社稷臣甫將隆指阻覲
盛儀載驗震爻雷已開於一索仰觀乾象星預卜於重

輝

賀皇后牋

國重貽謀慮尤關於坤母恩隆立愛索允協於震男茅
土疏封椒塗溢慶中賀恭惟皇后殿下徽音濬發柔德
夙全輔佐為心廣二南之風化贊成翼子衍百世之本
支雖熙朝寵數之肇新然睿慈保育之惟舊邦基用壯
壹範彌尊臣跡繫轉輸耳聽播告奉牋稱賀阻趨駕序
之班作頌對揚願繼螽斯之詠

慰皇帝表

景憲太子堯

天低儲禁方嚴鶴駕之朝雲黯層霄忽報鳳笙之遠望
乖寓內思切淵衷中慰伏以皇太子秉性川冲賦姿玉
裕早親教諭茂潛德以夙成豫建治安卜慶基之未艾
世偶無於盧扁人共惜於昭明恭惟皇帝陛下丕紹鴻
圖永惟燕翼念蒼旻之降割慨少海之揚塵臣久玷皇
華阻趨青殿承桃雖重願少抑於聖懷有道惟長宜益
培於國本

景憲太子牋

春宮定位罄中外以屬心宵駕凌空悵仙凡之異路臨
淒風而攀邈涓柔日以追嚴恭惟皇太子仁孝著聞春
秋鼎盛賓僚故在忍疎園綺之遊天意斯何靡念商周
之繼望瑤山而雪涕即寶宇以繙經伏願登衆妙門主
大乘器與道俱化吹笙竹於洛濱同佛往生涌寶蓮於
地上

謝封爵邑表

園丘展采禮舉三年方國蒙恩爵開五等望楓宸而被
寵執蒲壁以懷慚中謝欽惟熙朝最重裡事皇儀蒐舉
大光前振後之圖祭澤周流無泄邇忘遠之意而臣久
縻閭寄僻墮嶺陬既虛玷於筆索供奉之聯又莫陪於
邊豆奔走之列逮至宸廷之大賚亦叨井邑之光榮視伯視
侯蓋方五十里者不稼不穡胡取三百廛兮茲蓋恭遇
皇帝陛下道格顯幽仁周品物謂王者之尊必有父故
陟配天而率土之濱莫非臣未嘗擇地肆推餘餒加賁

遐蹤臣仰戴龍光俯殫駑鈍末繇奉職篚東國之玄黃
或可歸鄉班莆田之朱紫

謝賜衣帶表

侯蕃進職叨蒙命數之新宸闕頒恩爰賁身章之美瞻
天感泣跼地凌兢中謝伏念臣拱北一心落南五載方
叔甚慙於命服來試師干顓孫賴有於書紳可行蠻貊
老欲愆於膂力病已減於腰圍何意游領遽儲驟當異
眷雙袖龍鍾而曳紫萬釘錯落以纏黃豈曰無衣不若

吾君之賜可使束帶立於近侍之聯茲蓋恭遇皇帝陛下
下垂裳無為鳴佩中節謂設官分任有以功有以庸而
制禮異宜昭其度昭其數既俾參於週列則當辱於殊
恩臣惟守治條莫裨袞線觀書有得思陳在笥之言讀
易知非力鑒錫鞶之義

鐵菴集卷七

欽定四庫全書

鐵菴集卷八

宋 方大琮 撰

啓計幕

諸司

通漕使鞏吏部

刺史察六條僚英纏於天上崇臺非一幹容下士於幕
中仕焉得其所依榮也祇以為懼攜扶迫戍熏被通忱

某官名壓儒先道窮聖處載北方之學典刑來自於中原登東萊之門伯仲迭推於巨擘自聲華一振擺脫科舉之外以文章三昧鏗鏘政事之間最聲響撼於一同峻武晉儀於列院楷模黌舍誨諸生以性命之微筆削丹書引大義於章程之外所挾者大其進甚難輪兩朱轡二邦襦袴駕一封傳九路布泉方星輝白粉之圍已地偏紅雲之座議論竟以孤高而去聲色不動喜愠之交剖漢郡之竹遂行問謝池之草亡恙觀圭甫滌濡轡

載馳得非邊頭四郊多壘之秋全賴裏地萬舵千艘之
饋遲之以久而後召意者將多於前功金穀幾何上欲
問江西之事玉階數對公併輸幄內之籌某鈍不可磨
弱惟自植奏賦偶先於餘子竊恥雕蟲讀書欲見於古
人苦為汗蠹十五年昨夢二三考冷官投之於課試壘
鹽猶是書生之故習問所謂笑談畫諾不知幕辯之謂
何親友勉行庭闈告詔曷事而長自忖汝心忠所主如
立父師之前一於順是或妾婦之道聞已趣還勞之命

或庶幾未至之賓蕭何入守關中奚欠鮑生之末論裴
腆亟投門下敢期劉晏之深知載激懦忠難容吝腑

江西憲留郎中

按刑劇部遯瞻郎宿之輝列屬計臺均席使天之芘積
平日依歸之素如以身趨走其前潛以身聲見之眉目
某官胎光相閥歆血文盟議論鄙西漢之賢成將焉用
彼節義愛我朝之呂范是以似之謙冲宛一癯儒器械
直參諸老初亦相忘於琳館迫斯漫試於緹屏自詭循

良遺跡不妨招屈雅避聲譽所願則在封留不容列院
之逡巡旋復大農之佐貳銜君命出使絕域虜在目中
與宰相分領度支泉流地上相傳對篇之露奏亦太冷
語之冰人收身表著之上頭持節江湖者兩路惟三百
年立國培祖宗欽恤之仁故一再命明刑賴風采激揚
之使寃消叢棘種滿甘棠珥筆帖然可續太史江西道
院之賦驅車至止閒賡東坡塵外山亭之詩意者將多
於前功遲之以久而後召家釁亡恙矧陰積於于門鋒

驛趣還定有光於蕭葉某鈍未聞道貧坐為儒較藝先
登可鄙原夫之句教人未既其如笑者之嘲荒嬉為學
之工夫輕擲居閒之歲月出償親釜惕念民脂懷一分
及物之心有官箴在欠三寸翻瀾之舌如幕辨何雖贊
籌算鞭之中與受察繡斧則一況大父綴相榜之榮耀
而舊蒲本泉山之附庸望以邑子憐之庶乎吏議免矣
苟虧行檢何以對西山之靈尚丐恩波其有如贛江之
水心旌所向舌筆奚殫

本司官

運管李通直

燕臺上客領袖一幕之尊閩嶠孤生俎豆羣公之後
其不遐棄必矣請以先施卜之事大彌恭通名愧緩某
官鴈峯氣結駮索家傳灑落謫仙真太白後身之出鄙
笑進士有贊皇乃祖之風鐔出鐵中平反筆下手種黃
崗之桃李眼看赤壁之波濤芻粟幾何默動邊需之念
芙蓉笑入不妨上介之遊四牡咨焉一夔足矣却於吾

屬以加愛靡以已長而絕人解組朝天衆恐失依憑之
重拔茅征彙公欲引黨類而升某其來獨遲所向輒左
嗟校官閒散了此已十五年與幕長從容又不如二三
子既而復自解釋愈於全不遭逢少留數旬或尚陪座
中客安知一日不盡畀肘後方難以言傳進而面請

帥司官

帥參錢朝奉

戎閫元僚矧得三達尊之重計臺列屬妄容一男子其

間庀職雖異攸司執禮如事其長某官高名照世穹闕
倚天思昔先王保忠勲於吳越于時信誓指帶礪於山
河矧移錢塘之都慨念錦軍之裔自嘉定之相去國而
忠懿之門有公雅不擇官喜於論事密裨宣幕出舌底
之平章靜捲堂簾寓琴中之撫字屬湖未靖奉命促行
翩然分刺於柳城至則就頒於竹使建議弭賊全軀保
妻子者忌之有詔起家為帥之賓客則可矣蓋許國之
心如日而談兵之鬚未霜凝然贊輕裘緩帶之間暇不

失投壺雅歌之樂江湖為襟帶坐銷赤白之囊朝廷半
老成人驟朱丹之轂某藐焉何有謾亦自持冷官不出
閩鄉再遊乃入江國佐劉發運奚欠一賓有杜參謀實
長兩幕儻容孤拙得尾步趨入幄運奇非他人得與此
議乘機扣請或孺子可教以兵言則甚真理亦難拒

寓公鄰郡守

端明李尚書

莆壘一寒曾煖帥藩之襦袴江鄉列屬密依吏部之門

牆天借幸於及瓜地可階而御李攝齊趨進街袖贄恭
某官望穹三朝名殿諸老聲華跨竈傳豹尾之箕表議
論對牀居鴈行之領袖謂受用簡編也大萃平生精力
其間辨皇朝典故疑玉音嘉歎每怡軒表牋出紙價為
高匪徒見之空言凜可見其大節在紹熙留諫臣之去
當慶元斥用事者非禁橐有華得免益肅穹廬相語彼
揆實來屬改政絃宜參國柄乃徘徊於方岳幾歷徧於
文昌陶士元八為都督以輒遷司馬安四至九卿而求

去上留甚切詞苦莫回佚以真宮華之紫殿惟中外官
遊畫繡之日少故兒童迎笑野服之樂真耆英社相從
孺子亭可歎若非繫君民之念未有易泉石之清傳聞
丹宸咨問華髮衛公經濟大業竊陋進士之卑司馬輔
相初元亦自端明而召家風具在國典可稽某冷緒冰
寒名場浪戰偶然金帖南宮之浣榜時則玉季上坡之
司衡二老生春一官在泮人或謂之耗錢糜廩窮未至
於不飯無氊退而需篋之成長是則饑寒之實見耐窮

不屈鬼笑吾亦笑之贊饋此來上獲下斯獲矣思之未
得其成說拱而願師於大賢凡立身行已之方與事長
居官之要前言往行之孰可佩服先達後進之相為推
揚有齋乃心敢請其目舉一隅而不反何所取材或三
語之偶奇敢請薦掾布之典記惕甚負芒

本府官

教授梁同年

發藻諸儒憶共折帝城之桂依蓮下士清不如魯泮之

芹對賢主人懷我舊沉論心喜甚投贄先之某官胸吞
石渠舌瀉雲漢古括蒼之秀氣取數獨多今太學之名
流屈指可計金注既優於三舍冰銜合問於一條何必
道鹽愛熬波之語巧

舍選初
任鹽場

寧不足飯還繫馬之官清

問徐孺子之後謂誰意黃太史之澤未斬醫士風於久
弊接道脈於前聞休歎無羶西山之簾足捲倚看重席
東壁之書可翻某在儕輩中獨蹉跎甚何妨冷官冠者
五六人冒贊冰曹沛然百萬計試問鶚林上客乃吾虎

榜中人側聆羣寮案之間不獨一弟兄而已儻師儒引
領偕二三子以同遊則風雨對牀追十五年之舊話相
孚之妙不得於言

南昌管宰

經營幕燕不辭控地之勞問訊烏鳬便欲朝天而去將
叙繾綣少留斯須某官鍾厥品英遠哉源派昔齊鼻祖
曾援被髮之民在漢耳孫猶立揮鋤之節至今受賜有
後為宜賢聲相應於墳荒最績可書之金石試洪附邑

與汝為隣習熟於耳目見聞浹洽乎家庭唯諾罷滕王之舞佩奚損西山施武城之絃歌化為東魯將俾凡綰銅者勸盍陞諸鳴玉之聯某其仕以親皆名曰客栖栖可念坐羶亦無僕僕茲來聘幣安在懷古無益急今所須顧流馬之已遥慙無新畫挽征鞍而有請願賜片言逢寄一枝之春納交茲始共託千里之月索笑何時要之味同當以意會

鐵菴集卷八

欽定四庫全書

集部

鐵菴集卷九至十四

詳校官庶吉士

臣李傳熊

主事

臣呂雲棟覆勘

總校官進士

臣朱鈐

校對官編修

臣汪學金

謄錄監生

臣秦聯佩

欽定四庫全書

鐵菴集卷九

啓

本道守倅

瑞守齊寺丞

恭審起家二千石拜天朝之溫言並江十一城得道院
之名郡擁騎赴頒春之約壯賤愧賀慶之遲某官矯哉

宋方大琮撰

南強遠矣北學護蹕江左導見謂管氏之功執手周南
遷欲了父談之志墨綬未離於江面緹屏徑上於邊頭
從容對壘之邦輕裘鎮撫咨訪長淮之表沃轡驅馳賜
環平踐於清班借箸敷陳於大畧論高衆忌身退名香
復把麾而承流局舞袖之太褊瑞今內地甫供錦水之
吟青吾故家忽報齊疆之復聞之感舊重以籌思袴襦
少聽於塗歌帷幄入陪於國論某管窺自陋幕辨焉能
不足為一臺之重輕得竊窺諸郡之施設問訊喜來於

名勝謠謠旁震於隣封欲作賀賓相望一葦之莫到竊
知媿俗不與三州而並聲有大於斯如前所頌

隆興倅孔衍聖公裔

恭審贊藩曰二錫命至三問厥世家正襲素王之統燧
然公爵亶為洪府之輝邦之人曰未前聞臺有客欣然
作賀某官代習過庭之禮宅存藏壁之書古來南面之
帝王忽諸不祀天相東家之闕里施及無窮蓋與乾坤
合焉其賢堯舜遠矣五十一世之嫡嗣千六百年之正

傳降材自殊從政何有屢監州皆以名顯今佐岳則其
體尊百官之富出其門好官奚吝千乘之國可以道別
乘太拘前代嘗起而輔相之本朝有挺然臺諫者等之
而上疇曰不宜某仕於學之未優官相規而求益矧所
從來者先聖今猶疑有於異聞節愛藹然公以贊為邦
是急饋餉亟甚僕敢問去食何如誰謂之迂幸暢其說

交代馮運幹

廁賓僚之末綴欲罷不能瞻賢躅之在前忽瞠其後手

所植舊桃亡恙僕又種新竹以迎交代某官密探正宗
蚤參諸老伊洛之書奚負錮絕影銷潯陽之校有師訓
箋日出更瑟宏開於斯學拔茅獨遜於其徒畫諾幾何
欠臺家之餘債淹留底處尋壁記之舊題相視而驚試
問其故翹材館資賢于列羣從橐駝積以聞孰壞垂成
正堪一笑彼進此退加燈火十年之功小窮大通了簡
編千載之業塵齋滿牀之著述草堂謀野之經綸道待
位而後行功與言之並立某久客疲厭辱公後先悠哉

已分之工夫奪以吏家之案牘鼠窮於技鳥倦則還贊
饋運籌已試毋庸告者政德問業欲歸將有請焉荷甚
書先藏為世好

張帳幹

轉輸列屬如推車之欲行臭味得賢覺同幕之增重昔
相望各閩越隔今聯事如弟兄然厚甚襟期覘之眉目
某官材雖天得業自父傳奏賦幾年至今膾炙人口明
經有子恥與膏粱輩流警百里不以惠政縱夫姦据三

尺不以人命媚其上又持此道來佐于臺凡我賓聯得
賢使長有梓人者工得左右以趨如嚴君焉予之東西
惟命然不壓下以勢皆得盡人之情既多所長何憚不
告或曰笏鞭之算未免依人不如帷幄之籌自追乃祖
某名為計屬祇足書生對案羣鷺滿前恐羞於應作吏
一字無用是殆其然苟每事得因人成敢曰謀不自己
出然吾黨和與同之道異而從長大若小之殊合此所
聞悉以求教劉晏之客皆士類意者殆我輩人滕王之

閣集賓僚恍焉猶前日事以心相與未面已孚

王船場

凡我同舟均是計臺之客用汝作楫來從宰相之家江
頭企足以須書裏承顏而笑某官寶婺秀傑淳熙典刑
鍊石奇勲宛存槐蔭肯堂好手新立棘班衍三世青箱
之傳俾諸郎白眉者出蜚輓給饋在江之西舳艫課功
設場曰北吾事濟矣哲將在焉無夜半藏壑是虞將天上
乘槎可到某自知短拙幸共寅恭問錢穀幾何叶贊蕭劉

之績縱風波不動豈敢胡越其心行且盍簪敢稽報玖

葉船塢

從計使後謬參蓮客之羣有大匠來敢問梓人之道雖
貽賤謙不以告既會面請其何辭某官秀出相家昉遊
宦海便合乘槎而直上却問刻木之何如建臺据大江
之衝移局自外郡而至一道給饋舳艫之尾相銜兩塢
課功斧斤之聲不絕觀其所指畫者信矣若素宦然昔
者祖風嘗作濟川之楫久於父側習知轉漕之艘皇華

以稱職聞青氊可指日復某念似人而見喜何接浙之
來遲目斷欲穿早副幘下士之望心期相約勿作舟中
人之疑欲吐甚多亟酬未盡

帥司官

劉參議

瞻婺女星射斗牛分新帥垣之號令有滕大夫問議幘
之老成得劉賓客以同鄉同朝之雅好為此時此地之
勝遊某官學積功深論有根據執經麗澤久從太史之

遊筮仕清漳曾受紫陽之薦有大際遇聽小浮沉彈冠
迂寄於京廟影組徐躋於列院睦宗掌教入藩邸則漸
清策士臨軒直殿廬而益近自此升矣誰歟忌之乘遠
障浩不肯留持直道落其難合閩中素號無事聊復參
謀江右近警可憂或請易地境上流比所報諜敵內擾
何暇及人顧我自備者何如恃彼不來則誤甚既固吾
圉推及軍國之大謀趣歸舊班請決廟堂之密議某敢
說癡兒之了不勝嫠婦之懷輓粟督儲以歲旱告采薇

備遣奈兵驕何周旋兩司之間倚賴一賢之重雖六奇計非他人所得聞問一編書或孺子之可教所慙費敬乃後隆謙

孫撫幹

自閩涉江迭君兩幕以臺視閩如出一家唯居其上者無間語於父兄則為之屬者猶比肩之子弟得賢滋重拜賜多慙某官早以文鳴紛其內美孕毓三山之秀氣崢嶸六館之英聲如蜀兩蘇如吳二陸難昆既舒翹於

亞榜執事合更放於一頭眇視科名絕不掛口相從問
學銳欲名家既振鐸於宜春盍說經於廣厦視孫洪易
與耳毋庸館賓昔烏公何人哉尚可羅士矧今國脉寄
我詞臣自詭佐元戎之僚與密論當世之故赤白囊所
至幾處碧油幢所畫奚先雖襟帶內維比邊陲而稍緩
然籌帷促入當賓主以相從某自信其愚無庸於世冗
不見治之博士貧又來客於皇華昔讀史至流馬之謀
歎其有智今坐漕於羣鴛者對立而讀書驚時事之方

殷聞公來而竊喜機籌所運者大計蜚輓特居其一端
私竊疑之非止治文書而入幕所有請者或許陪友師
以論心以意相孚有言則沒

本府諸州官

謝教

同年

謁選修門共作江鄉之約久巢下幕何遲泮水之來一
笑相逢三同敘好某官合沙地望上蔡家傳淡墨氈書
得春闈雋半青舍選由夏校來雅不愛於熱官殆未忘

於習氣潮接昌黎之治匪但文名洪為山谷之鄉不專
詩派曰教云者以道在焉凡衿佩所至來從意疊舍之
緣未了毋填閒散更須入太學以誨諸生會有遭逢必
將坐細旃而舉明主某厥初入仕以冷自嫌及今為案
牘所禽翻不若蘼鹽之味飛雲畫棟相看宦海之漫漶
細雨簷花共說慈恩之舊夢報稽於施言出乎真

趙僉判

府幕元僚矧是冰壺之公子計臺一客自陳粉蔭之鄉

人且相携為膝閣之遊未便要作閩山之夢剝織喜甚
空谷跼然某官蔡燭觀書錦囊琢句隸華競顯壽獨殿
於諸昆芝砌傳芳名相聯於累榜中有足樂官不必災
議臬活千人之多撫字方百里者二抱南陽之婉畫愛
西江而重遊惟洪都舊號龍潛而元帥今得螭史凡百
政事當舉者與衆賓佐密決之如公此來不孤其望大
則平章於軍府暇焉題品於物華南浦高吟了此詩債
東平八侍歸歟詔音某仕偶為飢學未能飽莫裨轉粟

漫隨羣隊走趨竊意泛蓮自有一輩名勝宗英如許府
望頗增衆所稱者翕然僕之意則異是家山爾汝儻許
為忘年交賓客東南或尚可同日語由衷之請未面已
孚

譚節推

洪府大藩鎮以二三之執政

闕

名

卿其視贊輓粟者流奚足並泛蓮而語墜緘肯及拜賜
多慙某官以學成家其傳有父三間坡故居之屋起僦

郡之懷思百年譚太守之詩經誠齋之題品遺之來者
是以似之材地更覺於寬餘民曹昉開於步武曾謂一
再墨薦之書上不如數萬白粲之賞濃姑假塗乎奚傷
至入幕則有體鳴鑿舊地懸榻遺風矧帥相與常時殊
宜賓僚妙當世選笑談之頃休戚所關公衡尺以量材
當始其容持旌麾而出府宜昌而門某渴於見賢幸甚
同案滕閣高朋之滿如僕奚為廬陵君子之多觀公益
信交謹其始情浮於詞

南安余判官

傳聞候客蓮新池上之衣多謝鄉人梅贈嶺頭之信顧
紮在佐臺之遠不得與賀屢者俱某官粹然天資濟以
世美壺中秀氣趾此山者多得之水南名家似其門者
蓋寡矣兩仕未離贊邑一邦之號元僚峒丁與省民錯
居幕議藉大賢為重攜書寶界尋無垢倚柱之磚命駕
平亭訪祖師置鉢之石悠然川泳薦者瀾翻將縣大庾
以名還添入吾莆之比事某里居素拙漕畫可知紛同

窠而異鄉莫我告者隔似人於千里企予望之相與以情有如已面

袁州方錄參

飄然遠客入袁城羣窠之聯幸甚都曹自閩國同宗而至因念僕之臺長又為公之郡侯於此相逢良亦不偶某官天姿獨得世系有源元老叔興周緒出千年之遠太常儲在漢派由三子而分久矣居河之南繼又渡江而左在上浙者嚴之建德常出白雲原處士占吾閩者

莆與合沙俱以烏石峯得名然試問夫材孰寡孰多抑
所托之地有大有小舟楫方山之雄壯理宜大族之繁
昌榜艷金花班高玉笋至今猶說於名父有子克傳於
當家合踵登朝今猶治獄所關生人之命請盡君子之
心民自不冤無貴踊之鬻市身享其報駕高車而入門
矧如大琮是乃同姓尚為此地留者蓋以行司在焉西
風愁攬於旅襟上日喜聆於賢轍進既例陳於寮好退
又密敘於宗盟竊笑兩郡一嶺之交缺焉齒拜邈在三

峽五臺之下得以譜通詞不當駢施所宜報

柳司理

會府獄掾有三左獨居最名門家訓第一古來相傳移
之官必有可觀得其書何以為謝某官毫端光焰書種
源流在有唐號為禮法之庭至本朝有唱古文於世賢聲
相續劇治不辭弭盜有方澄岳樓之烟浪詰囚何處問
洪獄於斗牛自空圜之風不傳聞畫地之諺亦惴慮傷
汝體竭盡吾心母曰理官不在古三后之列有如司寇

亦居今八座之尊某本是山人強名臺客出則相盍簪
於寮案坐焉翻飛輓之文書聞風而敬士師焉敢跪於
下惠用字不當律令恐見嗤於儀曹何以教之是所望
也

建昌朱司理

樵水莆溪休作閩鄉之別李官蓮幙均為江國之遊賀
上莫前由中有喜某官天資甚偉風裁不羣地近紫陽
人謂考亭之族霜凝白簡家傳橫榻之聲卑之不屑尉

曹識者知為仙隱晉當畫接官以秋名汝往欽哉弼教
惟明民歆久矣得情勿喜所不若江河之易避有如盱
川非固求門閭之必高自報于德某漫佐輶之日久知
珥筆之風成無補蜚芻徒勞積積然念搜求情偽或於
故紙失之不若審聽色辭所活平人多矣非徒交施亦
有味言

隆興朱監庫

南豐有士足當此香吏部何官乃隱於酒笑僕之問粟

奚味覽君之緘藤甚高某官沉酣六經糟粕百氏詞場
苦戰寒花賸有晚香宦路徐行倒蔗漸逢佳境既脫簿
領又營糟丘調度急於版曹權酤至于江國若非為養
兵設亦豈欲與民爭醇乎萬家之春是則諸庫者職為
醞而仕耳竊議白眼之步兵縱意不在焉合作蒼顏之
太守某出本為於飢迫念不到於醉醲徒自心勞謬參
饋餉之百萬計儻以賢舉不如筦庫之七十家意之欲
寧言所不盡

南昌周宰

南昌冠八邑中有來賢尹濂溪去百年後得匪聞孫措
摩記壁之塵埃喚起銘心之德澤凡曰同案傳為美談
某官名壓羣英學推本統公生中古已矣不夢於周公
道在本朝崛起有起於營道惠爾後學況其留家精舍
進修把通書而為的泮林講貫畫太極以示人三復立言
一生受用今乃舊臨之邑入而首拜其祠議法常曰與
民仁哉斯語爭獄不屈當路直以事人見者謂若存兮

不然何其似也先生往矣局於持節秉麾執事成之繇
此得時行道某幼常有志壯轉無聞輓粟塵中久之厭
倦愛蓮亭上至則躊躇聆君茲來使我重感新政過人
遠甚端有源流遺書與世共之儻容質難曷酬厚意盡
去陳言

高安余宰

來從相閥號古子男之居言念臺家有小賓客者在肯
告之至熟味而慙某官材雖天成美亦世濟源流甚遠

嘗生慶厯之諫臣融結未休遂作紹興之魁輔將顯顯者為元成之子人駸駸焉及魏謨之孫治者所為丞哉奚負庾節既參於上介花封又訪於高安雖爲郡所領邑三然道院自負郭始治以聖書愛人之說質之縣譜藏家者同甚得斯民之心請借乃祖以頌巧於製錦歸我公是以袞兮譬之割雞宰天下如此肉矣某問其從出母乃太寒強置之畫諾之間非素所討論而得想傳觀書檄豈不笑幙下人欲叩問典刑安得為座上客所

幸密邇或可續聞

鐵菴集卷九

欽定四庫全書

鐵菴集卷十

宋 方大琮 撰

啓 將樂

交代曾宰

被毳田間焉知美製鳴琴堂上遽辱好音恍將入於迷
塗幸有導夫先路問朗雖邈報賜敢稽恭惟交代某官
南豐太史氏之家嘉定名貳卿之子生長聞見迥與人

殊問學文章多得天分裏以冠裳而不住直於韋布以
爭驅恬然算鞭漫爾哦竹盍趨玉筍屈試鏞川綰墨綬
以臨民妙齡難及擁黃袖而出令老吏皆驚如偃愛人
如由治賦不聞孔門此風久矣乃於龜山寓邑見之側
聽郵傳新求縣最鄭人歌僑之政不待三年建武召密
之封正當初戴某懶逐時好閒居日多掌泮佐臺當謬
參於賓客趨庭斂板乃下列於子男苟可親民不妨還
俗幼知有絃歌之訓近駭聞湯鑊之言博採旁詢審是

邦之利病轉難為易經執事之整齊有坦然之規足以
遵則冒焉而往有所恃為五斗米竊自憐其塵容持一
瓣香預有請於忠告占酬語短締好意長

通劍守傳寺丞

名門雅望鎮龍化之輿區隣壤小生忝龜山之鄉邑携
扶祇成熏被贊名恭惟某官挺特南土之奇源流北方
之學自忠肅不與賊俱活而樂齋又抱志未申英氣鬱
盤鍾作貳卿之傑諸賢凋落獨留一老之尊上欲起而

相之公曰吾有子矣歷稽賢業超出輩流面命家庭尚
古人鯁亮之節氣吞場屋陋進士軟熟之風自奏中牟
入陞左帑容臺議禮農危宣勞孤忠敷陳親結知於帝
幄衆目側視覺突立於班心掉臂不留把麾徑去七閩
皆鄉國易報平安兩境爭使君各如愿欲肅軍心於鋤
驕之項寒吏膽於束濕之中撫柔此民愛護如子休聲
熾甚識者憂焉初政圖回之方新善類離合之可畏盍
歸大老更起名流並為司徒舉周家之令典親攬庶政

朔漢室之中興伏念某自審迂愚不堪馳騫僅常掌泮
亦漫佐臺癖雅慣於田廬居閒最久出祇宜於州縣須
入何辭幼知有絃歌愛人之言與習聞撫字催科之說
以鹽為命則譜所無驚局面之生疎況心機之短拙包
茅不貢則闕賦繭絲太甚則厲民斟酌圖惟厥中伸縮
全繫乎上聞賢牧隆寬之易事白大人俱往而有辭敢
借潤於脂膏輕犯名教願少寬其轡勒勉竭疲駑飯倚
意長編摩字短

趙撫幹

企首藩垣雅宜上客折腰巖邑謬號長官疇昔楚東之
識賢為今閩裏之依茫偕陳短淺仰讀高明恭惟某官
禮樂宗英詩書帝胄好文博學如元祐之德磨對策鯁
言如乾道之忠定未弱歲而自拔又前人之所無久已
策掌泮之勲徐乃入佐戎之幕甌號與壤海無驚波近
交馳練士之大始預為戍邊之備無事揮翰文章動搖
於湖山有懷憂時念慮周匝於河洛八膺偕筮益狀維

城伏念某執別周星荒嬉送日骨凡如許敢作粗官之
嫌材拙非長不堪劇邑之試山僻而習尚獷賦夥而供
億艱綿薄自疑錦傷是懼天下之難唯縣為甚乃今知
幕中之弊其意已傳庶知免矣所為舛嚮未易剡裁

李運管

星軹贊饋亶資上客之賢雷土附庸謬竊長官之號僭
陳短淺仰噴高明恭惟某官秀孕嘉禾根蟠仙李少年
科第直大呼以成盧壯歲宦途覺徐行之有味跨飛鳧

而直上睨振鷺以不留為漕元僚愛閩佳地咄嗟餉辦
談笑誦清列叢桂於臺前行吟香裏嗅新芽於堂上細
品貢餘人疑其淹吾有以樂入備一歲錢穀之問匪但
十年旌麾之持伏念某牢落地寒陸沉歲久固嘗倚席
僅祖常談豈不佐軫了微奇畫不能自振毋怪徒勞幼
知有學愛絃歌之言與習聞撫字催科之說以鹽為命
在譜則無所闕下邑之慘舒全在上臺之操縱幸逢臬
味敢吐依歸幕中之辨其意已傳毋庸可說天下之難

唯縣為甚諒亦動心茫而全之深所望也

永福學職

永福寄居

得地一同蓋古子男之國去家三舍猶吾父母之邦愿
友其士之仁曰師則吾豈敢伏惟某人先輩鄉閭之望
學校之英筆挫風霜富胸襟之萬卷名高月旦宜領袖
於諸生試評三山莫盛一永十家而九書室七年而三
掄魁俄焉甲子之周行矣壬辰之值當仁毋遜嗣響奚
疑某久矣杜門茲焉入境聽誦聲之盈耳覺喜色之上

眉遊鄭校之鄉不妨議政接臨邛之客敢謬為恭率爾
占酬幸甚垂照

鐵菴集卷十

欽定四庫全書

鐵菴集卷十一

宋 方大琮 撰

啓

江西計幕

薦舉

上漕使羣吏部

子來幾日何裨幕府之文書我有二天肯傍誰家之門
戶固知士女自銜之可醜然於父師用情而亦宜所恃

至公輒萌妄想某冗焉三載閒則十年肯低其頭送窮
鬼之貧不屈此膝拜天孫之巧子雲好靜而求道退之
少晚則著書悠哉此心未能免俗因出營雙親之甘旨
竊有感當世之功名數米一二而炊此自孤寒之眼孔
輒粟百萬之計那知幹運於心籌方錢穀為相國憂而
鞭笞有膚使在所慙管識亡補臺家欲辨忘言喑主人
之一鴈以直事上羞嫫者之十禽無所短長放焉進退
幸不汝罵敢求已知聞公每有體國之言竊意莫大薦

賢之事愛之必自近者始僕其異乎人之求敢持弱植
仰問大鈞雖構櫨毋庸厦屋已成之時然木柱可補藥
籠尚虛之數是或有命庶幾賞音自知游夏之措辭莫
贊其力若問湜籍之叛否實臨此心不倍斯言請觀他
日

上憲使留直院

按部皇華竦瞻濡轡何物小子敢問大鈞居焉接壤之
諸生仕則聯臺之列屬此世俗攀援之常語非王公高

明所樂聞乃如愚衷竊有深感今薦員其極弊矣亦為士者有罪焉黃卷羅前皆持清議青衫羈縛漸變初心乞憐有甚於病畦脫選須離於苦海馴至達顯致身之地翻忘孤寒仰面之時貴者有挾而必從否則唾去其肯顧孰謂東閣典刑之盛復持江西英蕩之輝乃不為力勢所撼移若孰識齏鹽之臭味人以為異公如固然忠宣知人密傳先范老之法晦叔引類推廣大中公之心無非培植家世宰相之規模蓋越尋常流俗士夫之

見識求之今而僅有被其選者最榮顧如大琮見謂
小器少而奏賦浪駭聽於一軍漫亦說經冗不治者三
載謂解褐早則宜無得失之累且需泥久則盍有講貫
之期棄日力而荒于嬉負造物之望則甚幸聞師論未
甚途迷有賦不逐揚子之貧有文不乞柳氏之巧二親
戒毋苟祿以養一命苟可及人則為未四十作丞郎咄
咄休嘆轉百萬俾發運多多奈何森若置司均之受察
曩以莆士企清源者三舍今以漕掾望章貢之二星皆

非弱水之遙獨欠荊州之拜于隰所至雖山亦搖甚者
欲解印而逃誰歟作剡章之夢矧惟職狀是真探虎穴
覩得子之難叩以空談何異操豚蹄祝滿車之獲豈無
垂涎之欲者祇恐取辱而輟焉僕冒而前衆為之愕意
謂鄉貴得上林之賦索囊而空或問帝城有子公之書
搏手以對人皆笑其狂且妄已所恃者公生明如其扣
繫亡奇分甘肘足或者機緣偶合寧不動心敢出位而
言之若成功則天也伏遇某官先生梅巖標致槐鼎經

綸握蘭當榻以敷陳仗節單車而還報其議論當今少
對自學問定力中來身擁繡衣以謙接物家傳夾袋所
至收材方建臺則徧移公舉之文今察州又招揭律貪
之戒刺史不揚激久矣列城之觀聽竦然歷數品題人
物之精多是寒畯科名之輩某忘其自銜呼則大聲方
屈蠖為諸公所共憐苟成龍則五日其可集且得士亦
足以報所愧諛材使觀風之行不虛少還古意必有好
語毋容多言

謝蕭倉使舉政官

與徐撫幹清史同薦

焚香薦士雙檣俱飛盥手啟函一軍盡駭咸曰孤寒之
甚誰為高明之欺崇臺公道之所存私室謝恩之安敢
視昔者擁衡所寄求賢於賓客亦多泥與居易何如有
遠取近捨之恨洪視溫造等耳必朝羅莫拔乃來固皆
佳話之相傳未有同時而並進望臨川者一水庸使在
焉隸豫章之兩司列屬皆是采其尤既登於學館持此
望交歸於門牆然旅淮南之丹紛然雞犬空冀北之廐

敢辭駕駘

鐵菴集卷十一

欽定四庫全書

鐵菴集卷十二

宋 方大琮 撰

啓

謝衛帥大參舉政績

慕韓公之名蓋嘗同海內士受歐陽之薦今遂為門下人
出王公風裁之精非世俗露章之比許與嚴而人服力量
大而言行欲謝何辭獨竊有感今之天下所憂蓋在於本

根譬之弱人其病毋求於理脉江東之王佐遠引客館之
人流可覘諉曰乏才距不誣世杜衍用則所引皆知名輩
司馬相則其徒有行道心還慶厯之休明見元祐之氣象
人心歸嚮久有屬矣宗社靈長終將賴之近為北門守鑰
而來咸曰山東歸袞之漸一鶴動興萬牛莫回野服與父
老相從在公樂甚夾袋之姓名久悶如衆望何已動搖故
鄉之思猶收拾數士而去如大琮者獨何人斯不能為時
輩之重輕況足闕世數之消長少而奏賦壯夫望而恥之

中亦說經弟子笑于列者無負郭之二頃凡閉門者徒以
斗升驅之臺府紛文書之盈几隨掃隨生問芻粟之餉邊
孰多孰寡事固有大於此位不容出而思若積薪未焚可
為流涕者二幸執贄而見毋慮吐哺者三不敢出尖
於衆中若蔡小異於坐上幸官不曠奚績足言飛騰鶚表
之書得尾羣彥持白鶴髮之老勸加一餐袞褒之語不虛
鈞播之意有在某磨礱素志激勵深知方陳推謝之私敢
班無厭之請選離坑塹望切庭闈與其龜勉仰面於他

人孰若終始歸命於我相所舉四方士豈無才品之更高莫難千載逢儻念狂愚之足取不負臨賀有如西江

上觀使衛大參

漁溪嘗蒙清獻之知屢煩薦表明允既因韓公以進猶再投書愛之必曲成乃休求者至游請則瀆然而前修所不免則於小子乎何嫌敢憑深恩盡露誠悃世何常乏賢者之用患無以受天下之才或吐哺以至三或旁招而在列尺度權衡之下有劑量焉毫毛絲粟之能無

遺棄者否則用之不盡甚至散而莫收時事日新此貞
觀初年而奚若舊弼家食宜貞元朝士之無多以公歸
兮正天意也開翹材館益日延於千人坐退思堂局歲
舉者三士此固海內之所共覲既出門下亦又奚求重
念某自初投八幕之身端不作通閨之夢才各有所限
人豈不自知讀古人書未能津涯作俗士文不足金石
習諂則方心難鑿欲辨而鈍舌莫搖不識中朝一貴人
祇延座上五窮鬼才學功力世所有者咸無焉掩伏縮

藏人不知之何愠也一撮自埋於衆牘諸臺誤問其姓名偶然陸君交有孜孜薦引之心緣此侯喜輕重勃勃仕進之念物至終窮則反理宜大有所遭慕司馬洛中名自兒童始聞范公陝西間以賓客從登進從容受知感奮分合竭微勞於臺府亦欲陳半策於廟堂企望袞還庶幾鈞播名已在公車之列薦援是入東閣而有辭猶欲陳情豈不聒聽持寸管偶脫場屋累五剡乃出選坑浮屠合尖長繩結尾功須於一舉手世謂之再登科

二老呼兒來前視吾髮白一相為世盟主待汝眼青試
往東緼乞火其前斷無失節落枝之悔謹再拜受命退
乃三熏修辭願武公之入相親見太平如任安之在門
誓無叛去

答士友

江西計幕

老熊解元入湖堂

有儒哉冠以文衞袖斂而節奏則非流俗四六語肆其
汪洋則為長書千餘言陳誼甚高整容熟讀竊惟設書

堂初意本以待場屋外人入而求性命各正之本原靜以觀喜怒未發之氣象湖光几案有浴沂舞雩之遺竹影庭除供陰風弄月之興自周孔顏曾以來所傳者凡關洛朱張之書皆在焉能齊其真有足以樂夫亦奚負於吾輩乃今又添於耆儒上寓公之舊避名當路之推重衆欣私淑之有此老僕亦公餘而質所聞然深玩一篇陳情之詞猶覺抱萬里思子之痛

元於蜀

顏路不聞其

過戚子夏或責其太傷達道順天乎何尤進德與年而

俱邵所存遠矣幸領畧焉

漕貢臨江袁監押

摩空作賦偕計策名愛筆硯而不投肯同噲伍羣衣冠
而角戰本占盧前居亞偶然登先自此某官先輩西江
秀氣東漢名家四世五公青氈尚矣一門八薦淡墨半
之漫食濮邸之魴再翔漕闡之鶚光騰斗射識卜洲連
隆興識云三母鶚吾冠擲舊銜如脫屣傳臚近陞收高
洲連出狀元第於摘髭某佐幕休休入京去去及見趨省闈之日考

官奚取瑕疵儻遇新進士于塗老婆休說塗抹珍投非
暗善禱何如

鐵菴集卷十二

欽定四庫全書

鐵菴集卷十三

宋方大琮撰

正書

江西計幕

監司守倅縣官

江西倉蕭著郎

元日在璿璣整齊七政大慶受寶玉榮懷萬邦矧惟翠
節之尊宜介青祺之輯某官陽和德宇月潔詞華激濁

揚清冰生羣吏之膽賑濟議貸春在萬姓之膚式舉叔
觴入膺荷囊某受容漢部矧出韓門愿將汝水之烟波
斟為美醪更指戕峯之松竹用祝修齡輒託魚書少代
燕賀

回臨江軍楊寺簿

某伏以獻歲初吉端月始和某官剖竹策勲賜金褒最
借留滿道扶翊有神台候動止萬福某遙瞻賀牀併壯
謝憤願加頤養之吉入赴泰通之交

葉主簿

稱獻歲之觴頌椒有喜語向陽之木栖枳為多某官富有賢稱昉為世用髯鬚盡黑雅宜稱於青春簿領勾朱肯徒銷於白日靡不如願其始自今某燕幕淒然貂裘弊矣正一曰元日皆受歲以相懽四十是明朝獨流年之有感且與同輩交賀泰通

武寧樓尉

桃符執厲式宣司警之威椒頌紀時茂介履端之慶某

官宦隨業進道與時行予室安眠不聞夜吠四郊笑語
已泛春聲惟北部愛少府深恐東君歸上苑去某居然
幕破况又帳開念綈袍不能自完如僕寒甚若玉璽果
盼大賚與君同之斐然奉酬還以為頌

冬書

江西計幕

監司郡守

賀江西倉

日書黃道聿增一線之長星驗清臺果協五珠之瑞維

部使者自天祐之某官勁節凝霜英詞煥斗方立朝而
正色挺特歲寒宜察部以鋤姦森嚴風采道豈容於久
鬱陽至復而必亨入相明君密扶元氣某問漕下之冰
未泮念帳中之風猶凄然夜半雪飛報嶺梅之消息朝
來灰動併谷黍以吹噓誦詠意深編摩字短

某惟魯史五雲之書為外諸侯言周易七日之復為內
君子言某官今之循吏邇者四隣以歲歉告獨樂郊以有
年書則宜春臺上書雲之日其又得祥必矣此外之已

應者然今之端人乃心王室久勞于外消長往來之機
於復見之有其象而無其驗可乎此內而當應者推而
為泰之通晉之接則道長之效也某一寒最甚蒙溫言
以披拂之固知君子以氣類為念也不敢勞撫綺語請
以經對惟領畧幸甚

興國軍李司直

某恭以燕寢凝香報珠連於夜半熊幡憑軾看景至於
日南宜有嘉祥式昭吉旦仰惟某官名高瑞世之斗舌

帶設兵之霜坐黃石城自延辟穀之算對赤壁岸潛息
飛灰之塵乘此陽亨入而冬見某漕下之冰未泮帳中
之風猶寒雲曷墜前粲然郇公朶翰春來底處知是司
業酒錢既九頓以登歲又再拜而起祝勤拳之悃矜炤
是祈

進賢王宰

獻長踐之履聿嚴太史氏之書我進賢之冠正應內君
子之象屬時小至受福孔多某官三異休稱一同和氣

圭景南至終餘北嶽之風聲書林日長飽讀初寮之文
字合趨陽生之候入趨冬見之朝某遑恤下客之身寒
且喜吾儕之道長放梅舒柳想成滿縣之芳剪水染雲
少代登堂之賀因酬來施莫匪謠言

豐城林宰

登魯觀之臺書雲禮也望豐城之邑有氣佳哉宜其主
人介爾景福某官心同琴適政與錦新筆下梨花端是
噓枯之手江邊種柳扇成解凍之風圭景初長壘甕已促

某材如韞短愁似線添癯然天賦之寒未遑身計屬此
陽剛之長交慶道亨

庚辰

東湖黃講書

生日回贄

日困幕塵坐生逢於南斗神馳親舍正望逐於飛雲詎
圖山谷之間孫特借方壺而壽我稱重善禱鏗鏘妙詞
誠可被之管絃慙無歌者謹珍藏於笥篋時出觀之

辛巳

東湖馮學錄

羽檄在道漸無幕容之謀孤天掛門竊感男兒之事念
天生我以奚用愧皇揆予之有初敢謂博雅之醇儒亦
出頌禱之妙語荷君厚意顧今何時必上則報君父之
恥讐此學者說性命之根本吾生無補世何闕茲甲辰
天運既周歲又逢再辛巳懷此已久觸之而言

壬午

東湖堂長傳法師

揆予初度笑南斗之不神有朋遠來為東湖而借重敢
圖大雅亦費清吟某官味道之腴得詩之派地孕麻山
之秀屢見桑田家縣商傳之傳來從箕宿宜其得壽推
以愛人某仕正及強志猶有感夫子嘗不動心矣敢問
何如後生所畏無聞焉願明見告

東湖職事

暮春五六月覺遊從之可樂明朝四十歲驚老大之相
推入當為郎之年出合專城之日彼哉言也我則異焉

金史卷之八十三
問學就荒恐墮無聞之後友朋惠顧幸未見惡於人鏗
鏘大篇褒拂初度生吾前者敢問不動心何知幸明告
之亦足為強仕之助

三山郡解元

我生悠哉三見西山之面容句佳甚併攜北海之尊且
飲且哦以喜以愧粉榆共話於七聚蓬矢固在於四方
子將決勝而行吾辨賦歸之計來春三月何處又得新
詩避道長安善頌有如此酒

賀皇姪節使

生日

某恭審仙源衍慶宗邱毓奇雅韻中涵貯金天之露氣
祥光下燭先銀漢之星期宣錫獸樽和熏麟玉某欣逢
盛旦倍劇懽悰瞻太白之符豈無賀識誦秋陽之賦愧
乏坡詞併瀆菲儀仰祈采覽

回鄉守張秘閣

友

白髮餘生已抱鰥夫之感雌堂雅好特貽幼婦之詞方
小人不知紀年而君子乃為善禱兢兢然捧戴允矣記存

恭惟某官循良巨師醞藉賢牧心傳家學少通安世之
書手擅文名見謂燕公之筆千里沐聲明之教一陶皆
仁壽之風顧如羈蹤尤荷異眷豈寓士所至固國君之
加禮抑勞民之首尤仁政之宜先欲寵綏以竹裏之庖
且獎拂以花間之詠非獨門闌之私幸殆關風化之大
端而某閒中聞車馬以驚猜老去任衣裳之顛倒攬迎
不暇喜懼交并締觀麗以則之詩恐負愛欲生之德深
藏為好時誦銷憂身隱白雲玄英不復出矣編傳黃石

赤松儻可遇乎甚愧投珠若為報玖

王正字 邁

枯槁餘生逢春已晚奇窮薄命任斗不神惟磨蝎所莅
之宮有子卯相刑之說昌黎值之而捃謗坡老遇此以
招讒而况晚生敢攀前哲或報蓬壺之巨擘特揮椽筆
之長篇在常人為湯餅諛說之時而明公胥藥石苦硬
之語益堅益壯如鐵漢之元城不辨不休如芻言之忠
肅遂令衰懦亦或激昂昂然念少壯相期固將許國中聞

同出皆匪愛軀得非臣罪之當誅敢曰吾謀之不用今則自搔華鬢空耿丹心感劬勞之章二親已矣痛悼亡之賦隻影蕭然不復志桑矢於四方祇合旅樵漁於一壑醉鄉之酒山陰之鵝皆出君家以為僕惠矧重盼於地粟豈不勝於野薇自此哦臞軒甚富之詩與後村寡和之曲有足以樂復奚所求優游卒歲以不知生死太平而無憾笑方叔而已老安得壯身羨王喬之長存豈非仙種所願受延年之訣不敢開談命之書縮於賡酬

見則愧謝

鐵菴集卷十三

欽定四庫全書

鐵菴集卷十四

宋 方大琮 撰

書

劉吏部

克莊

悼亡屬爾有類鰥氓待老蕭然方營孤首但覺餘生之
多感安知初度之來臨敢謂謙厓特加軫記帖盼吉語
猶未能免俗之言詞寫壯懷益以德愛人之意難勝期


待徒有兢慚顧永廢夢我思親之淚濕而愧懸孤矢報
國之志荒幸明時搜攬之甚寬則孤跡湮沉而奚久蚤
知世味豈必掛神武之門所願身強常得侍耆英之社

回王正字

遺

老我羈游已斷六孤之夢故人遠訪先馳雙鯉之書登
然空谷之足音折了過門之履齒良鄭重甚如悚愧何
恭惟某官李白謫仙徐邈清聖五湖三江之氣落落不
衰萬馬千兵之文凜凜可畏雖筆端之清麗尤交誼之

歲寒每逢賤生輒贈好語政切彼美一方之望乃煩不
遠千里而來水沉似盈尺之苓地栗當如瓜之棗復奏
一闕直成三奇某愧無雪兒可歌留與雲孫為寶清興
不淺幸勿回子猷之舟濁世可憐安得從王喬之履亟
茲馳候畧敘謝悰



鐵菴集卷十四

欽定四庫全書

集部

鐵菴集卷

十五至二十

詳校官庶吉士_臣李傳熊

主事_臣呂雲棟覆勘

總校官進士_臣朱銓

校對官編修_臣汪學金

謄錄監生_臣秦聯佩

欽定四庫全書

鐵菴集卷十五

宋 方大琮 撰

婚書

回宋

比隣歲久知諸老之游從門戶日新尋兩家之盟好蔚
甚象賢之醞藉藐焉弱息之功容方二難共復於公侯
迺一族相為於妯娌便蕃委貺珍重拜嘉好事到門竊

為吾兒吾孫之喜遺書滿屋願紬乃祖乃父之藏

林回徐

北境詩來報家山之入夢東牀選重欲兒女之及時如
忠宣之滯留未歸而洪氏之婚姻不廢輒援舊比用合
新歡某人學士自力簡編接二魁之族緒舍妹小娘粗
閑箴訓遺九牧之家風茲領幣交豈輕金諾質母黨以
曰可諒父懷之亦同為國而齧雪旄言旋是望入門而
會冰玉語笑何如

方回洪

相望一舍羨詩禮之方興締好兩家幸典刑之僅有吾
輩各酬於兒債歡顏俱溢於親闈幼女何知行媒交至
有如佳婿真得味於書中豈必諸姑多擇於榜下黃緣
偶契於片語臭味殆同於宿交吉書入門和氣滿族當
諄勤姆訓庶幾婦德之修宜濡染父師行趾世科之美

鐵菴集卷十五

欽定四庫全書

鐵菴集卷十六

宋 方大琮 撰

婚書

聘顧

鳬鳥過家溫十年之舊話魚緘出嶺合二姓之新歡以我
輩宦官之同為兒曹夤緣之幸伏承令女小娘素閑箴訓
愛篤乃翁學生某粗力簡編拙如其父許修永好敬贄吉

書矧遷喬木之新居真合比隣之昔語向平婚嫁兩家交喜
於及時洛社游從二老相攜於他日亟馳菲幣具載別牋

聘劉

合婚好而成宗敬親為大擇行義而論世生子亦仁彼
哉世俗之談直是禮經之外常持此說式契乃心惟文
肅之與先公自淳熙以至今日婚姻不替忠厚相承壯
矣吾兒正營求於中饋婉兮季女方肄習於少儀甫片
語而遂成若宿緣之有待其自兩翁而下實寵嘉之既

諧二姓之歡永為好也

定陳

入嶺聯司益隆交誼通家締好嘗請姻盟不待晉賢遣
門生而求觀非如程錄謂婦性之難擇僉云二美今可
百年持書以溫前言欣焉報可望鄉而有喜色至則合
并

聘陳

迭上要塗莫留長孺言旋舊里竊比子平合二姓之姻

盟增兩翁之喜色庭趨詩禮敢言大方之家閨秀德容
雅稱有媯之裔以身為教此意皆同非特嶺海之昨逢
正契比隣之初議命敬事了公兮盍遙於漢庭承宗禮
成老者宜需於洛社

方回顧

通婚論譜文獻相輝聚族收科武陵最盛上則六鰲之
成列近而一鳳之創飛既父兄之譽藹然知子弟之賢
必矣猷犢夙憐於一女卜龜無易於此郎古語入門喜

聲滿室羣從曰我同盟之好伯姊曰姑有姪以從乃若
衷祈非止恩澤侯之謂願言歡合式觀詩書種之昌

方聘吳

壯歲聚頭期身名之早遂中年回首覺兒債之相催本
朋友之人倫亦婚姻之天合每庭趨而必戒鈍毋如翁
藹閨秀之有聞訓閑於姆承茲金諾敬以幣交矧慈親
來從於一家宜喜色並見於二老具言飴弄諸孫突其
成兮行拜冰清半子可以教矣

鐵菴集卷十六